



揚州圖經卷六

事志六 南宋

高宗建炎元年四月龍圖閣直學士知揚州許份請王

卽位於揚州不許李心傳建炎以來繫年要錄四

五月壬辰詔梁揚祖爲徽猷閣侍制知揚州續資治通鑑九十八

壬寅江淮發運使梁揚祖與工部員外郎楊淵同提領

措置東南茶鹽公事置司眞州時東北道梗鹽筴不通

揚祖奏眞州水陸要衝宜遣官置司給賣鈔引所有茶

鹽錢並充朝廷封椿諸司毋得移用故有是命同上

丁巳詔江寧府鄧揚二州儲資糧修城壘以備巡幸宋史

二十

六月己卯詔沿河淮江置帥府沿淮帥府二治揚廬續資

沿通鑑九十八

七月十三日辛丑詔請元祐皇太后幸揚州徐夢莘三朝北盟會

編一百一十

八月徙諸宗室於江淮以避敵於是南宮北宅皆移江

寧府願留京師者聽之南班至江寧者三十餘人又移

南外宗正司於鎮江府西外於揚州西外二年正月甲午宗正司三年四

月辛酉南外三年十二月又移建炎以來繫年要錄八

命江淮發運副使李祐自南京至真州躬督糧運及見

在金帛赴行在上

九月壬辰以金人犯河陽汜水軍詔擇日巡幸淮甸

宋史

二十
四

七日甲午奉聖旨將來巡幸駐蹕揚州行下知揚州呂

頤浩修治城池繕部員外郎陳充幹辦舟船並椿辦糧

草發運使李祐淮南轉運使李傅正並隨軍轉運使

三朝

北盟會編
一百十三

壬寅遣徽猷閣侍制孟忠厚迎奉太廟神主赴揚州

宋史

二十
四

二十一日戊申元祐太后及六宮至揚州正衙牌曰車

駕巡幸駐蹕之門

三朝北盟會編一百十三

二十七日甲寅車駕發應天府上巡幸江都自應天府

進發

同上

乙卯趙萬陷鎮江府守臣趙於崧棄城渡江保瓜州

宋史

二十

四

冬十月丁巳朔上登舟幸淮甸翌日發南京戊午隆祐

太后至揚州初太后過高郵聞叛兵焚鎮江乃遣兵扼

瓜洲渡及是入城駐於州治

建炎以來繫年要錄十

己卯上次寶應縣御營後軍作亂孫琦者爲之首左正

言盧臣中從駕不及立舡舫叱賊爲所逼墜水死上命

求臣中所在得之水中拱立如故殿中侍御史張浚以爲雖在艱難中豈可廢法乃劾統制官定國軍承宣使韓世忠師行無忌士卒爲變詔世忠罰金中書舍人劉珏言無以懲後浚再上章論且乞擒捕爲變者乃降世忠觀察使上下聳然始知有國法又詔臣中知無不言而死於非橫特贈左諫議大夫賜其家銀帛百匹兩官

子孫二人

同上

癸未上至揚州駐蹕州治舊制三衙管軍未嘗內宿至是始日輪一員直宿行宮

同上

十一月丁亥朔曲赦應天府宿亳楚泗揚州

三朝北盟會編一百

四十

上以揚州路滑始聽百官乘轎建炎以來繫年要錄十

丙申曲赦南京宿亳泗楚揚州高郵軍以上巡幸所嘗

過也同上

甲子詔入內高品趙舜輔揚州兵馬都監徐洪並日下

監押出門同上十一

徽猷閣直學士知揚州呂頤浩試戶部侍郎兼權知揚

州續資治通鑑一百

建炎二年春正月丙戌朔上在揚州建炎以來繫年要錄十二

甲午移揚州宗室於泰州高郵軍命秘閣修撰趙令憲

知西外宗正事主管泰州宗子皇叔洺州防禦使士從
添差同知西外宗正事主管高郵軍宗子令憲燕懿王
元孫舒益公世逢子士從仲湜子也

同上

帝詣壽寧寺謁祖宗神主

宋史二
十五

己亥張遇焚真州秘閣修撰孫昭遠爲亂兵所害

同上

庚子張遇陷鎮江府初遇自黃州引軍東下遂犯江寧
江淮制置使劉光世追擊之遇乃以舟數百絕江而南
將犯京口既而回泊真州士民皆潰將作監主簿馬元
穎妻榮氏爲賊所得榮氏厲聲罵賊爲所害榮氏蕤女
弟也翌日遇自真州攻陷鎮江守臣龍圖閣直學士錢

伯言棄城去時秦魯國大長公主避地南來其中子右金吾衛上將軍愕爲賊所戕頗掠其家人而去辛丑入內侍省押班邵成章除名南雄州編管時金人攻掠陝西京東諸郡而羣盜起山東黃潛善汪伯彥皆蔽匿不以奏及張遇焚眞州去行在六十里上亦不聞成章上疏條具潛善伯彥之罪曰必誤國及申上怒詔成章不

守本職輒言大臣故有是命

建炎以來繫年要錄十二

羣盜有張遇等號一窩蜂

熊克中興小記三

庚戌遣考功員外郎傅雱爲淮東撫諭使

宋史二一十五

辛亥兩浙制置使王淵招賊張遇降之遇自金山寺進

屯楊子橋眾號二萬會淵還行在白將數百騎入其寨
招之遇見淵器械精明惶懼迎拜淵曰汝等賴我來晚
故得降不然已無遺類矣淵奏以遇爲閤門宣贊舍人
守臣錢伯言乃得還其府遇猶縱兵四劫扈從者危懼
戶部侍郎兼知揚州呂頤浩帶御器械御營使司前軍
統制韓世忠聯騎造其壘曉以逆順禍福執其謀主劉
彥礫於楊子橋縛小校二十九人送淵戮之餘黨怖而
釋甲得其軍萬人隸世忠

建炎以來繫
年要錄十二

三月辛亥以范瓊權同主管侍衛步軍司公事屯真州

宋史二
十五

六月甲子疎決行在揚州及四京繫囚雜犯死罪以下

減一等釋杖已下

建炎以來繫年要錄十六

八月甲戌上策諸道正奏名進士於集英殿

同上十七

庚辰詔東京所屬官司般發祭器大樂朝祭服儀仗法
物赴行在時上將祀天南郊命有司築壇於揚州南門

內江都縣之東南而從行無器仗故取之舊都焉

同上

九月甲申武節大夫閤門宣贊舍人京城外巡檢使丁

進叛率眾犯淮西進初受宗澤招澤薨乃去時韓世忠

軍中有進餘黨百餘人世忠盡斬於揚州竹西亭斬至

王權有武臣段思者勸世忠釋而用之尋命御營右軍

副統制劉正彥以所部收進同上

庚寅上御集英殿賜諸路類省試正奏名進士李易等四百五十一人及第出身同出身而川陝河北京東正奏名進士一百四人以道梗不能赴皆卽家賜第特奏名張鴻舉下至五等皆許調官鴻舉以龍飛恩特附第

二甲易江都人鴻舉邵武人也同上

壬辰召侍從所舉褚宗諤等二十一人驛赴行在宋史
五

丁酉賜新及第進士錢千七百緡爲期集費自是以爲故事李易等以上憂勞辭聞喜宴從之建炎以來繫年要錄十七

冬十月甲寅言者論維揚之城可扳援上下其濠池可步而往來乃詔揚州修城浚濠仍令江淮州軍閱習水

戰

同上十八

十一月己丑江淮制置使劉光世還行在李成之敗也獲其黨之家屬詔分養於真秦楚三州至是光世具上男女六百餘人帝謂宰執曰此曹身且不顧豈卹其家朕念作亂者非其家屬之罪故令分養之黃潛善曰臣聞光世凱旋過楚州降卒見家屬無恙皆仰戴聖恩朱勝非曰郊赦中可載此以見陛下德意帝又曰昨於光世處得成所用提刀一重七斤成能左右手運兩刀所

向无前惜也惑于陶子思邪說使朕不得用之是日光
世俘子思詣都堂既而以火燃於開明橋上其軍士降
者皆釋之

續資治通鑑一百二

庚子詣壽寧寺朝饗祖宗神主

宋史二十五

二十二日壬寅就江都縣築壇南郊大赦天下

三朝北盟會編

一百十九

京東賊李民詣行在請降王淵殲其眾留民爲將

宋史二十

五

十二月戊寅禮部侍郎張俊兼御營使司參贊軍事時
金人橫行山東羣盜李成輩因之爲亂金左副元帥宗

維將自東平歷徐泗以趨行在而宰相黃潛善汪伯彥皆無遠畧且斥候不明東京委之御史南京委之留臺泗州委之郡守所報皆道聽塗說之辭多以金繪使人伺金之動息於是淮北累有警報而潛善等謂成餘黨無足畏者金牒知朝廷不戒亦僞稱成黨以欸我師上以邊事未寧詔百官言所見吏部尙書呂頤浩上備禦十策其說甚備戶部尙書葉夢得亦請上南巡阻江爲險以備不虞上曰自揚州至瓜洲五十里聞警而動未晚夢得曰河道僅通一舟恐非一日可濟也夢得又請以重臣爲宣總使上一日召諸軍議事中軍統制官張

浚奏敵勢方張宜且南渡復請移左藏庫於鎮江吏部
侍郎劉珏亦言備敵之計兵食爲先今以降卒爲見兵
以糴本爲見糧二者無一可恃維揚城池未修卒有不
虞何以待敵不報殿中侍御史張守上防淮渡江利害
潛善伯彥滋不悅乃請遣守撫諭京城守卽日就道至
是聞北京陷議者以爲敵騎且來而廟堂晏然不爲備
浚率同列爲執政力言之潛善伯彥笑且不信乃命浚
兼參贊軍事與頤浩教習河朔長兵

建炎以來繫
年要錄十八

建炎三年正月車駕駐揚州

三朝北盟會
編一百二十

己丑奉安西京會聖宮累朝御容於壽寧寺金兵執淮

陽守李寬殺轉運副使李祓以騎兵三千取彭城間道

趨淮甸

宋史二十一十五

十六日乙未金人破徐州將侵揚州二十一日庚子禁百官搬家出城邊報屢至朝廷未有禦之之策宰相潛善伯彥殊不介意人皆危之有搬徙出城爲避敵之計者潛善伯彥慮恐搖動眾心乃禁百官搬家出城市井

驚慌益不安矣

三朝北盟會編一百二十

丙午御營平寇左將軍韓世忠軍潰於沭陽初世忠在淮陽將會山東諸寇以拒金會左副元帥宗維兵至滕縣聞世忠扼淮陽恐稽師期乃分東南道都統領兵萬

人趨揚州以議事爲名使上不得出而宗維以大軍迎世忠世忠不能當夜引歸軍無紀律未曉至宿遷縣不虞金人之踵其後也質明覺之奔於汴陽世忠在汴陽夜不安寢與其帳下謀夜棄軍乘潮走鹽城縣翌日諸軍方覺遂潰去其將閻門宣贊舍人張遇死於漣水軍之張渠村後軍管隊官李彥先率本隊四十七人得二舟入海聚眾自此輔達聚眾於漣水李在據高郵皆世忠之兵也其餘收散卒自爲徒黨者不可勝計宗維入淮陽軍執守臣奉直大夫李寬而去京東轉運副使朝請大夫李祇從軍在淮陽爲所殺後贈中散大夫

建炎以來

繫年要
錄十六

二月尼堪自東平由襲慶徐泗以侵揚州

三朝北盟會編一百二十

庚戌朔上駕御舟泊河岸都人惶怖莫知所爲知天長軍楊晟惇奏已拆浮橋始詔士民從便避敵官司毋得禁上卽欲渡江黃潛善等力請少留俟報且搬左藏庫金帛三分之一上許之戶部侍郎葉夢得卽具舟楫從大將假二千人津發一日而畢然公私舟交河中跬步不容進矣夢得復請以戶部所餘物前期支六軍春衣及官吏俸一月亦從之遂命御營統制官劉正彥以所部從六宮皇子往杭州幹辦御藥院陳永錫護皇子又

遣吏部尚書呂頤浩禮部侍郎張浚往沿淮措置金人以數百騎奄至天長軍統制官俱重成喜將萬人俱遁亟遣江淮制置使劉光世將所部迎敵都人謂光世必能禦賊而士無鬪志未至淮卽潰

建炎以來繫年要錄二十

按金史太宗紀天會七年五月乙卯拔離速等襲宋主於揚州考繫年要錄諸書高宗之去揚州也在建炎三年二月况五月戊寅朔是月無乙卯金史誤書五月乙卯耳

金人以支軍攻楚州守臣直秘閣朱琳具欵狀遣人迎降開西北門納金人開東門縱居人自便軍民皆趨寶

應縣欲至揚州渡江金人覺之悉邀回城中

續資治通鑑一百三

是日揚州城內居民爭門以出踐死者無數從官有詣都堂問二相者黃潛善汪伯彥皆曰已有措置不必慮百官聞此復自相慰以知事實者莫如宰相今既云爾未宜輕動居民亦以爲然夜江都縣前火皆戍卒自焚

其居

建炎以來繫年要錄二十

壬子金人陷天長軍上遣左右內侍鄭詢往天長軍覘事知金人至遽奔還上得詢報卽介胄走馬出門惟御營都統制王淵內侍省押班康履五六騎隨之過市市人指之曰大家去也俄有宮人自大宮星散而出城中

大亂上與行人並轡而馳黃潛善汪伯彥方會都堂或有問邊耗者猶以不足畏告之堂吏呼曰駕行矣二人乃戎服鞭馬南驚軍民爭門而出死者不可勝數上次楊子橋一衛士出語不遜上挈手劍刺殺之時軍民怨黃潛善刻骨司農卿黃鑄至江上軍士呼曰黃相公在此數之曰誤國害民皆汝之罪鑄方辨其是非而首已斷矣少卿史徽丞范浩繼至亦死給事中兼侍講黃哲方徒步一騎士挽弓射之中四矢而卒是日鴻臚少卿黃唐俊渡江溺死左諫議大夫李處遯爲亂兵所殺太府少卿朱端友監察御史張灝皆不知存亡鑄南城人

唐俊唐傳兄也先是布衣譙定被旨赴行在上將用之及是失定所在呂頤浩張俊聯馬追及上於瓜洲鎮得小舟卽乘以濟次西津口上坐水帝廟取劍就靴擦血百官皆不至諸衛禁軍無一人從行者是夜金遊騎至揚州守臣右文殿修撰黃願先已遁去簽書淮南節度判官吳某權州事民喧呼皆備香花迎拜金人入城問上所在眾曰渡江矣金人馳往瓜洲望江而回引兵屯摘星樓下縱火城內煙焰燭天臣民子女及金帛所儲爲金人殺掠殆盡南陽尉晏孝廣女年十五有美色爲金人所得欲妻之晏氏卽刎縊求死居彼中二十年卒

不能犯金人義之金人之未至也公私所載舳艫相銜
運河自揚州至瓜州五十里僅通一舟初城中聞報出
城者皆以得舟爲利及金兵至潮不應聞盡膠泥淖中
金兵取之如捨乘輿服御官府案牘無一留者初賊斬
賽來就招朝廷因以賽統制本部軍馬會邊報日急乃
命賽與統制官王德屯眞州及上渡江德焚眞州而去
官吏皆散走發運使梁揚祖亦遁賽與其眾往來於江
中

同上

癸丑金游騎至瓜洲民未渡江者尙十餘萬奔迸墮江
而死者半之舟人乘時射利停橈水中每一人必一金

乃濟比敵至皆相抱沉江或不及者金兵驅而去金帛珠玉積江岸如山時事出倉卒朝廷儀物悉委棄之太常少卿季陵獨奉九廟神主使親事官負以行至瓜洲敵騎已逼陵捨舟而陸親事官李寶爲敵所驅失太祖神主太學諸生從上南狩者凡三十六人是日金人入

眞州

同上

甲寅金人揭榜於揚州市西北人願還者聽之西北人去者萬餘人自邵伯鎮往太興後爲薛慶軍者是也

同上

乙卯金人去眞州斬賽引兵復入城頗肆殺掠後數日守臣向子恣至以義責之

續資治通鑑一百三

丁巳下詔慰撫維揚遷徙官吏軍民同上

金人侵泰州守臣朝請大夫曾班以城降時金人自揚州分兵而來班聞之聚軍民議曰金重兵臨城班義不當去相與死守之若何眾皆哭曰願以生靈爲念屈節投拜保全一城班遂遣兵馬鈐轄張亢齋降書詣軍前植降旗於城上率軍民迎拜金人入城置酒高會居數日盡掠其金帛而去

建炎以來繫年要錄二十

乙丑金人屯揚州城下遣擐甲執旗者一人入城諭士民期以三日盡出西城過期者殺并數揚州人之罪謂留上也民無出城者同上

初冀州雲騎卒孫琪聚兵爲盜號一海蝦江淮制置使
劉光世招降之維揚之役行在諸軍皆潰琪擁光世之
妻向夫人在軍中由真滌奔淮西事之如光世琪至廬
州帥臣胡舜陟乘城拒守琪邀索資糧舜陟不予時出
兵擊其抄掠者凡六日琪遁去

同上

戊辰呂頤浩劉光世移兵屯瓜洲渡與金人對壘

續資治通

鑑一
百三

金人焚揚州初金遣甲士數十人

按北盟會編此乃入丁卯日復入城者

揚州諭士民出西城人皆疑之猶未有出城者是日又
遣人大呼告以不出城者皆殺於是西北人自西門出

則悉留木柵中惟揚州人不出夜金縱火焚城士民皆
死存者才數千人而已

建炎以來繫
年要錄二十

庚午金人去揚州

同上

金人自揚州還至高郵軍城下守臣趙士瑗棄城走判
官齊志行率軍縣官出城投拜金人劫掠而去有潰兵
宋進者初爲韓世忠圍人至是更名世雄聚兵二百餘
犯泰州守臣朝請大夫曾班遁去世雄入城縱掠推錢
糧官裴淵爲旨班自劾待罪坐貶二秩

同上

辛未江淮兩浙制置使呂頤浩聞敵退渡江至真州收

權貨務錢物

同上

壬申呂頤浩遣閤門祇候陳彥入揚州

同上

癸酉韓世忠小校李在叛據高郵

宋史二十五

乙亥御營左軍統制浙西馬步軍副總管李安知揚州

建炎以來繫年要錄二十

戊寅江淮兩浙制置使呂頤浩奏已復揚州詔尙書省

榜諭士民

同上

三月庚寅以劉光世爲太尉淮南制置使

宋史二十五

初上旣渡江同知西外宗正事士從自高郵軍招潰卒

屯興化縣時淮南東路提點形獄公事裴廩薛彥國在

一洲上士從招二人爲參謀官言於朝乞假江淮制置

使上從之士從聞高郵賊李在往楚州遣統領官乘虛掩襲至嶽廟下遇紅巾百十皆殺之取其衣偽稱在黨行至草市行伍不整謹噪殺人在覺之出兵迎敵僅以身免

建炎以來繫年要錄二十一

初江淮制置司前軍統領官王德自眞州渡江入江寧有眾數百復渡江至和州

同上

四月乙丑薛慶據高郵軍慶初自揚州遁與其黨灌理通泰野澤間後同李在襲取高郵守之在與其次爭事相殘殺眾乃推慶

同上十二

初金人既還泗洲洪澤間有大小官舟千餘皆不取時

淮陰縣吏孫晟攝行縣事洪澤闢軍羅成等不服遂與其徒邵青輩率舟船犯淮陰晟避去先是韓世忠潰於沭陽其後軍將李義者往來於寶應之間有眾數百人相約合兵圍楚州成取綵繪以爲帆旣而義爲邵青所破官軍追殺之

同上

五月乙未知樞密院事張浚罷爲資政殿學士提舉杭州洞霄宮初薛慶欲求厚賞乃留浚三日而外間不知謂浚爲慶所執真州守臣以聞呂頤浩與李炳滕康共議罷浚樞筦以御營使司前軍統制王玠爲淮南招撫使統所部往平之

中興姓氏錄薛慶傳趙姓之遺史皆云張浚至高郵薛慶詐迎入城見浚

之貌曰豈有如此樞密也遂執之浚隨行有陝西兵多
遭殺者慶逼浚出所賣官告三千道而館之按此卽當
時傳聞之詞恐不至是日歷紹興二年三月七日進武
副尉張存狀於建炎三年五月內受到御營副使張樞
密劄子勘會高郵軍屯駐統制官薛慶下將佐使臣人
兵能保護無虞居民歸業係河北郡忠義之士因金人
侵洛州累年堅守勢力不加轉戰千餘里皆曾殺獲委
有功效昨隨李民來赴行在又能堅守忠義再立勞績
深可嘉尙今依奉聖旨各與轉三官資內存係民兵甲
頭至今未曾陳乞正授文帖詔張存轉兩資其借補劄
子令尙書省毀抹據此慶求厚賞則有之而所謂迫浚
令出官告三千道則恐非其實也又紹興四年三月王
子張浚申本軍使臣韓福喬德建炎三年五月內張樞
密到承州補正承信郎所有承到張樞密付身未曾換
給足明傳聞之妄今併附此

以備參考 同上二十三

辛丑張浚自高郵至行在復以浚知樞密院事先是淮
南招撫使王玘旣渡江會薛慶旣得厚賞用其黨王存

計亟以兵衛浚而出上聞之歎息即日趣歸浚辭曰高郵之役徒仗忠信雖不至如所傳聞然身爲大臣輕動損威其罪莫大詔不允遂以慶守高郵軍是行也御營使司主管機宜文字承直郎任覲至高郵遇賊墜馬死

上命以銀帛卹其家錄其子仲全爲忠州文學

趙姓之遺史云

薛慶之執浚也屢欲殺之其黨王存勸止之曰眞僞未可知若殺眞樞密則異日欲歸朝廷其可得邪慶然之浚遂得歸按此亦傳聞之詞以任覲之死及浚奏劄之語觀之慶其初亦必稍有不順但終於感化不至如遺史所云耳今不取同上

六月戊申朔宣武軍節度使東京留守杜充兼宣撫處置副使節制淮南南京東西路先是朝廷聞充引兵赴行

在乃除充節鉞仍節制京東西路應天大名府許便宜
行事至是又申命之朝議大夫御營使司參議官高衛
復爲徽猷閣待制時衛添差江淮等路發運使根括諸
州移用經制獻納等錢二百餘萬緡故有是命

同上二
十四

七月辛丑初朝廷以蘄賽爲淮東馬步軍副總管屯揚
州已而復判招撫使王玘與遇於興化縣玘軍不整爲
賽所乘大敗制書金鼓印文皆爲賽所得玘僅以身免
同上二
十五

冬十月敵分兩道侵江一自滁州逼江東陷滁州壽春

廬州濠州和州無爲軍眞州

劉時舉續宋編
年資治通鑑二

十一月庚申金人陷眞州守臣向子恣棄城保沙上其所攜金帛悉爲韓世忠所奪

建炎以來繫年要錄二十九

丁卯杜充引親兵三千絕江而北統制官王進王冠猶以本部隨之時上遣內侍任源至充軍前道梗不達以狀白充充卽附奏以謁初乞御營諸將聽其節制實無妄自尊大之意但欲人情相諳緩急可使令耳劉光世遠在九江不得使韓世忠近在鎮江不能使倘王夔有心報國當陳淬等接戰之際乘勢向前敵兵必敗豈有今日臣今在儀眞檄召徐泗二州趙立劉位等集兵迴鎮江以護王室此區區困獸之志也時充在眞州寓天

慶觀守臣向子恣勸充自通泰入浙欲與之偕行充有
邪謀不聽子恣棄真州去充命冠知真州自爲出陸計
聲言往招信縣會劉位兵來援遂北行

同上

建炎四年春正月金人攻楚州守臣趙立拒之

宋史二
十五

丙午上御舟次章安鎮直徽猷閣江淮發運副使兼前
糧料使宋輝自秀州金山村以海船運米八萬斛錢帛
十萬貫匹至行在時百官正闕饋食從行者甚賴之上
喜欲擢輝徽猷閣侍制宰相呂頤浩以太峻難之乃除
輝直龍圖閣

建炎以來繫年
要錄三十一

二月乙未尚書右僕射同中書門下平章事兼江淮宣

撫使杜充罷爲觀文殿大學士提舉江州太平觀充自
眞州而北完顏宗弼遣人說充許以中原地封之如張
邦昌故事充遂降敵知眞州向子恣以聞上聞之不食
者累日

同上

六月戊寅以知建康府權邦彥爲淮南等路制置發運

使

宋史二
十五

丙戌以郭仲威爲眞揚州鎮撫使

同上

秋七月庚申以岳飛爲通泰州鎮撫使

同上

八月庚辰拱衛大夫福州觀察使承州天長軍鎮撫使
薛慶及金人戰於揚州城下死之完顏宗弼旣屯六合

縣欲自運河引舟北歸而趙立在楚薛慶在承扼其衝
不得進宗弼患之左監軍昌自孫村來見宗弼計事欲
會兵攻楚州真揚鎮撫使郭仲威聞之約慶俱往迎敵
慶以是月戊寅出兵己卯至揚州仲威殊無行意置酒
高會慶怒曰此豈縱酒時邪我爲先鋒汝當繼後上馬
疾馳去平旦出揚州西門從騎不滿百轉戰十餘里亡
騎三人仲威不至慶於其下走還揚州仲威閉門拒之
慶倉皇墜馬爲追騎所擒馬尋舊路歸承州軍中見之
曰馬空還矣太尉其死乎仲威棄揚州奔興化敵長驅
犯承州兵馬鈐轄王林出城迎敵不勝亦奔興化承州

陷慶在承久軍食既足不復斂取於民王官自京師至者館穀甚厚皆按格賦祿官兵隸承州者月糧時帛如令給之至視其徒則戰士計日廩食老弱計日受券而已金人自浙歸大寨於天長六合間慶親率眾劫之得牛數百悉賤其估分畀民之力田者民懷其惠亦賴其捍禦以自固敵假道於承以攻楚慶不聽至是被害慶起潢池其眾多驍勇敢鬪慶臨敵勇亦能以少擊眾故慶死承州遂陷楚勢孤卒無以抗敵人皆惜之訃聞贈保寧軍承宣使

建炎以來繫年要錄三十六

九月金人攻楚州帥臣趙立告急上命劉光世往援之

東海王彥先首以兵至淮河扼敵不得進高郵薛慶至揚州轉戰被賊死光世畏敵騎眾不敢前岳飛雖能爲援而眾寡不敵彥先中砲死而城陷

續宋編年資治通鑑二

按薛慶死在八月承州陷在九月是時詔命岳飛趙立腹背掩擊故有眾寡不敵之說

甲午劉光世遣王德勳瓊以輕兵渡江乙未遇金游騎於召伯埭敗之

宋史二
十五

九月壬寅劉光世奏淮南諸鎮郭仲威潰散薛慶身亡趙立不知存亡岳飛見在江陰軍不見赴鎮劉綱以所部渡江赴行在散在南北岸昨過金人見留承州臣遣

王德渡江過召伯埭擒敵軍四百餘人詔光世以所俘
赴行在旣而德自天長引兵趨承州不得入斬所部左

軍統領官劉鎮而還

建炎以來繫年要錄三十六

丙辰金人攻楚州趙立死之

宋史二
十五

辛酉金人犯揚州統制靳賽逆戰於港河敗之

同上

戊辰金人陷楚州

同上

以王琳知承州

續宋編年資治通鑑二

冬十月辛未秦檜自楚州金將撻懶軍中歸於漣水軍

宋史二

十五

甲申趣劉光世救楚州

同上

乙未岳飛破金人於承州同上

丙申詔劉光世節制諸鎮守禦通泰州伺便襲金人過

淮同上

丁酉知承州王琳自興化率餘兵奔通州建炎以來繫年要錄三十

八

己亥通泰鎮撫使岳飛在泰州持法嚴眾不敢犯前軍
統制官傅慶衛州窰戶也有勇力飛愛之慶恃其才視
飛爲平交飛無忤色及飛爲鎮撫使待之頗異慶不悅
會劉光世遣王德來承州飛命慶以兵會慶與德語云
願事劉公德許之統領官王憲聞其言以告飛憾之至

是飛令諸將射遠慶獨至百七十步旣而飛取上所賜戰袍金帶遺統制官王貴慶醉謂飛曰當賞有功者飛問有功者誰慶曰慶在清水亭有功飛大怒曰不斬傳慶何以示眾遂斬之

同上

十一月丙午通泰鎮撫使岳飛自柴墟鎮渡江金左監軍昌旣得楚州有經營南渡之意乃攻張榮鬪潭湖水寨金人屢攻榮阻湖淖不得進及是天寒水深遂併力攻其焚城榮不能當焚其積聚而去金人進犯泰州飛以泰州不可守棄城去率眾渡江屯江陰金沙上

同上
三十九

先臣在承州秦州盜起王招寇城東張榮寇城北詔先
臣還守通泰乃旋師至白炭村至柴墟屢戰俱捷諜報
金人并兵二十萬將取通泰有詔秦州可戰卽戰可守
卽守如其不可且於近便沙洲保護百姓何便掩擊先
臣顧虜勢盛秦州無可恃之險初三日全軍保柴墟戰
於南霸塘金人大敗擁入河流者不知其數相持累日
而秦州爲鎮撫分地不從朝廷應付糧餉乏絕刳虜尸
以繼廩越二日乃下令渡百姓於陰沙先臣以精騎二
百殿後金人望之不敢逼遂屯江陰

岳珂金陀
粹編五

丙辰金人陷秦州

宋史二
十五

十二月命張俊爲江淮招討使

金陀粹編五

按宋史在正月

紹興元年正月己酉金人犯揚州

建炎以來繫年要錄四十一

三月壬子朝奉郎通判泰州馬向就差知泰州招諭軍民歸業并興鹽場等事先是張榮在通州以地勢不利乃引舟入縮頭湖作水寨以守金右監軍昌在泰州以舟師犯榮水寨榮亦出數十舟載兵迎敵望金人戰艦在前榮皇遽欲退不可徐謂其眾曰無慮也金人止有數艦在前餘皆小舟方水退隔淖不能岸我捨舟而陸殺棺材中人耳遂棄舟登岸大呼而殺之金人不能騁

舟中自亂溺水陷淖者不可勝計昌收餘眾二千奔楚
州榮獲昌子媚佛寧俘馘甚眾榮自京東來未嘗承王
命遂無路告捷聞光世在鎮江乃遣人懇聽節制且上
其功光世大喜以榮知泰州

同上四十三

四月劉光世復楚州

宋史二十六

五月丙午眞揚鎮撫使郭仲威爲劉光世所執初仲威
聞敵退乃以其將李懷忠知揚州而自往眞州屯駐仲
威與李成有舊聞其在九江欲往從之時滁濠鎮撫使
劉綱以所部屯建康之雨花臺仲威爲所扼不得進復
還揚州謀據淮南以通劉豫光世遣前軍統制王德往

捕之宣言游徼淮上至維揚仲威迎謁於摘星樓德手

擒之遂并其眾

建炎以來繫年要錄四十四

郭仲威出於寇盜號郭大刀劉光世爲淮浙宣撫置司

京口遣其將王德擒仲威至麾下殺之

王明清揮塵後錄十

冬十月庚午以徽猷閣直學士湯東野爲江淮發運使

宋史二

十六

戊寅初命兩浙安撫大使劉光世宣撫淮南七州至是

光世請鑄淮東宣撫使印置官屬給錢糧增將吏時已

賜揚楚等諸郡錢各二萬緡乃命鑄真揚通泰承楚州

漣水軍宣撫使印皆許之

建炎以來繫年要錄四十八

紹興二年二月丙寅命浙西安撫大使劉光世將銳卒萬人移屯揚州光世不奉詔同上五十一

紹興三年三月奏淮東久闕帥臣乞以徽猷閣直學士提舉江州太平觀湯東野知揚州充淮東安撫使右承務郎鍾離濬嘗任高郵縣丞熟知本路利害特遷一官通判揚州仍命神武右軍授湯東野兵千人以行賜米六十斛黃金二百兩白金三千兩爲養兵之用同上六十二

庚申初命神武後軍統制兼都督府都統制巨師古以所部萬人屯揚州壬戌孟庾奏留之不許同上六十三

壬午以韓世忠爲淮南東路宣撫使宋史二一十六

紹興四年九月庚午金齊合兵自淮陽分道來犯壬申
渡淮楚州守臣樊叙棄城走韓世忠自承州退保鎮江

府

同上二
十七

冬十月丙子朔淮東宣撫使韓世忠奏蕃僞兵馬犯承

楚州

建炎以來繫年
要錄八十一

己卯淮東宣撫使韓世忠以所部自鎮江復如揚州初
上聞敵騎渡淮再以御札賜世忠畧曰朕雖不行亦以
君國子民而祖宗德澤猶在人心所宜深念累世涵養
之恩永垂千載忠誼之烈世忠讀詔感泣遂進屯揚州

上同

乙酉詔通泰眞揚州守臣更切體度地利務要限阻敵船及不得有防湖泊水寨民社保聚自金人入境揚州官吏退保陰沙承州官吏皆散淮東轉運判官郭楫亦挈家先遁徽猷閣待制新知揚州宋伯友至鎮江奏言孤獨一身委實前去未得乞郡兵萬人與韓世忠同赴敵迎戰乃命伯友從便先次交割伯友引疾乞奉祠許之同

戊子淮東宣撫使韓世忠邀擊金人於大儀鎮敗之初奉使魏良臣王繪在鎮江被旨趣行乃以是月丙戌渡江丁亥至揚子橋遇世忠遣使臣督令出界繪顧良臣

日幸免管押二字亦是光華至揚州東門外遇選鋒軍自城中還問之云相公令往江頭把隘入城見世忠坐譙門上頃之流星庚牌沓至世忠出示良臣等乃得旨令移屯守江世忠留食良臣辭以欲見參議官陳桷提舉官董收遂過桷等共飯世忠遣人傳刺字謝良臣繪且速桷等還桷收送二人出北門繪與桷有舊駐馬久之以老幼爲託泣數行下左右皆傷怛晚宿大儀鎮翌日行數里遇敵騎百十控弦而來良臣命其徒下馬大呼曰勿射此來講和敵乃引騎還天長問皇帝何在良臣對曰在杭州又問韓家何在有士馬幾何繪曰在揚

州來時已還鎮江矣又曰得無用計復還掩我否繪曰此兵家事使人安得知去城六七里遇金將聶嘑貝勒同入城問講和事又問韓家何在良臣曰來時親見人馬出東門望瓜洲去矣繪曰侍郎未可爲此言用兵講和自是二事雖特旨抽回將在軍君命有所不受還與未還使人不可得而知初世忠度良臣已遠乃上馬令軍中曰視吾鞭所向於是引軍次大儀鎮勒兵爲五陣設伏兵二十餘處戒之曰聞鼓聲則起而擊敵聶嘑貝勒聞世忠退軍喜甚引騎數百趨江口距大儀鎮五里其將託卜嘉擁鐵騎過五陣之東世忠與戰不利統制

官呼延通救之得免世忠傳小麾鳴鼓伏兵四起五軍
旗與敵旗雜出敵軍亂弓刀無所施而我軍迭進背嵬
軍各持長斧上搃人胸下捎馬足敵全裝陷泥淖中人
馬俱斃遂擒托卜嘉通贊遠孫也

同上

己丑淮東宣撫司前軍統制解元與金人戰於承州敗
之初金人至近郊元知之逆料金人翌日食時必至城
下乃伏百人於路又伏百人於城之東北嶽廟下自引
四百人伏於路之一隅令曰金人以高郵無兵不知我
在高郵必輕易而進俟金人過我當先出掩之伏要路
者見我麾旗則立幟以待金人進退無路必取嶽廟走

矣果然則伏者出眾皆諾又密使人伏樊良俟金人過則決河岸以隔其歸路食時金人果徑趨城下元密數之有一百五十騎乃以伏兵出麾旗以招伏要路者皆立幟以待金人大驚遂向嶽廟走元率兵追之金人前遇兵無所施其技盡被擒凡得一百四十八人戰馬器械皆爲元所得

同上

解元傳承州城中兵不滿三千金萬戶黑頭虎直造城下約降元匿其兵以微服出僞若降者金人稍懈俄次發擒黑頭虎未幾金兵四集元戰却之追北數十里金人赴水死者甚眾

宋史三百六十九

巳亥韓世忠遣翊衛大夫宣州觀使本司提舉一行事務董畋右朝奉郎直移閣本司參議官陳桷以所俘女真一百八人獻行在因言陳州陣歿人乞厚加贈恤上蹙然曰使人死於鋒鏑之下誠爲可憫可令收拾遺骸於鎮江府擇地理殯仍歲度行童一名照管

建炎以來繫年要錄

八十

十一月庚戌詔承楚泰州水寨民兵並與放十年租稅科役仍撥錢米贍之時承州水寨首領徐康潘通等遣兵邀擊金兵俘女真數十旣命以官尋又賜米萬石

同上

乙卯韓世忠遣兵夜劫金人營於承州破之

宋史二十七

十二月辛巳命中軍統制王進屯兵泰防扼通泰同上

己丑權淮東安撫司公事趙康直劾泰州兵官任顯不

服使令已械送有司乞行竄責建炎以來繫年要錄八十三

辛丑泰州陵亭水寨馮定捕敵三十九人同上

壬寅省淮南轉運司宋史二十七

紹興五年春正月己酉免淮南官吏去職之罪仍令還

任承州水砦統領仲諒復入楚州同上二十八

乙丑罷淮南茶鹽提刑司置提點兩路公事官一員兼

領刑獄茶鹽漕運使市易事同上

閏二月戊申詔賜揚州錢萬緡為興葺官府之用建炎以來

繫年要錄

八十六

十一月辛巳復置淮南提舉鹽事官 宋史二十七

紹興六年二月壬寅改江淮屯田為營田 同上

丙辰韓世忠圍淮陽軍辛酉兀朮救淮陽韓世忠引兵

歸楚州 同上

三月乙巳以世忠為京東淮東路宣撫處置使 同上

六月甲寅張浚渡江撫淮上諸屯 同上

紹興七年二月丙申夜太平州火丁酉鎮江府火先是

偽齊劉豫遣姦細縱火於淮甸及沿江諸州於是山陽

儀真廣陵京口當塗皆被其害 建炎以來繫年要錄一百九

夏四月罷淮南提點司東西兩路各置轉運兼提點刑

獄提舉茶鹽常平事

宋史二十八

六月乙未罷江淮營田司令諸路安撫轉運司兼領其

事

同上

十二月庚午命韓世忠留屯楚州屏蔽江淮

同上

紹興八年十一月庚戌北使書狀官行臺尙書省主簿

魏千運卒於高郵軍賜白金六百兩張通古等還乃焚

其骨而歸

建炎以來繫年要錄一百二十三

紹興九年五月辛卯復命江淮守臣二年爲任乙未復

置淮東提舉茶鹽司

宋史二十八

八月己酉復淮南諸州學官

同上

紹興十一年正月辛巳直秘閣知泰州王暎兼通泰州

置使措置水寨鄉兵控守二州

建炎以來繫年要錄一百三十九

張俊知秦檜欲罷兵首請以所部隸御前且力贊和議

檜深喜之遂罷三官撫司乃命俊岳飛往淮東撫韓世

忠之軍

御批歷代通鑑輯覽八十六

紹興十二年十一月癸巳以左司郎中李椿年為兩淮

轉運副使專治經界

宋史二十九

紹興二十六年正月庚午左中大夫知常州沈調知揚

州

建炎以來繫年要錄一百七十一

紹興二十七年冬十月癸卯築通泰楚三州捍海堰宋史

十三

紹興二十八年春正月癸未遣戶部郎中莫濛等檢視

淮南沙田蘆場同上

六月甲寅增淮東沙田蘆場租課置提領官田所掌之

同上

紹興二十九年閏六月己未罷淮東沙田蘆場所增租

課同上

辛未復置江淮路提點坑冶鑄錢官同上

紹興三十年三月癸未以淮東茶鹽司錢十萬緡充募

民墾田費

同上三十一

七月辛巳建武軍武承使許世安添差淮南東路馬步

軍副都總管揚州駐劄

建炎以來繫年要錄一百八十五

紹興三十一年六月壬寅拱衛大夫利州觀察使張榮

添差淮南東路馬步軍副總管泰州駐劄榮本泰州土

豪建炎間聚眾為盜屢與敵角故復用之

同上 一百九十一

八月乙卯江淮制置使劉錡引兵屯揚州錡將渡江以

軍禮久不講乃建大將旗鼓以行軍容整肅江浙人所

未見也遣殿前司策應右軍統制王剛以五千人屯寶

應同上 一百九十二

辛酉劉錡在揚州得省劄謀報金以二十五日渡淮謂
右朝奉郎通判楚州徐宗偃曰錡來日提師自天長趨
盱眙君速歸語太守寶應以北日下清野勿留寸草有
不如約當以軍法從事又謂轉運副使抗曰錡調人馬
公主軍食各有司存毋相侵奪倘糧運乏絕非人情敢
私三日宗偃至楚州金以是日渡淮之說已無驗守臣
主彥融以未得制置司檄亦不聽宗偃乃白錡願以策
應右軍移屯城下

同上

戊戌江淮浙西制置使劉錡發揚州錡在揚州病上遣
中使譚某將醫往視錡曰錡本無疾但邊事如此至今

猶未決用兵俟敵人侵擾然後使錡當之既失制敵之機何以善後此錡所以病也中使以奏錡遂行時錡已病不能食但啜粥而已

同上

十月乙卯江淮制置使劉錡聞王權敗乃自淮陰引兵歸揚州錡之未退也檄淮東副總管張榮以所部人船盡赴淮陰是日榮被檄卽發泰州至楚州則大軍已退其所統民兵皆驚潰榮收散亡僅千人至邵伯埭決運河水入湖以自保焉

同上 一百九十三

丙辰侍衛步軍司右軍統制邵宏淵以左右二軍至真

州

同上

戊午侍衛步軍司左軍統制邵宏淵及金國統軍蕭琦戰於眞州胥浦橋西琦自滁州至瓦梁扼滁河不得渡執鄉民歐大者問之大因紀紹興十一年韓世忠以數百騎往定遠虛驚而回至瓦梁盡毀民居爲浮橋恐金人效之乃答以有路自竹崗鎮可徑至六合縣琦從之俾爲鄉導遂迂路半日故六合居人皆得逃去宏淵在眞州方飲酒有報金人已至者亟率眾相遇於胥浦橋宏淵命將官三人拒於橋上金人弓矢如雨王師多死城中老弱皆竄避惟守家強壯猶登城以觀正爭橋間敵塞草以渡河三將皆死宏淵親隨軍入城掩關以拒

故軍民皆奔於江上得舟渡江以免宏淵毀閘板退屯於楊子橋遂眞州陷敵得城不入徑自山路侵揚州江淮制置使劉錡軍還至邵伯埭聞金犯眞州疑揚州已不守未敢發會探者報揚州城上旗幟猶是官軍錡曰雖失眞州猶爲國守當速進乃自北門入見安撫使劉澤澤以城不可守勸錡退屯瓜洲錡令諸軍憩息徐圖

所向

同上

壬戌江淮浙西等路制置使劉錡退軍瓜洲鎮金陷揚州初邵宏淵旣失利金人自山路徑犯揚州屯於平山堂下宏淵亦退在楊子橋南毀閘板而渡揚州軍民皆

傾城而奔錡乃退軍自南門外拆民屋浮橋諸軍過絕
卽毀橋東門而去守城武功大夫榮州刺史劉澤亦奔
泰州往通渡江入平江府

同上

甲子聞虜陷揚州百官宅遷徙一空

吳震元南
宋相眼一

乙丑員琦敗敵於皂角林初金人旣得揚州卽遣兵逐
劉錡來爭瓜洲渡錡命部將賈林仲吳超等拒之於皂
角林員琦陷重圍下馬死戰數合部將王佐以步卒百
有四人往林中設伏敵旣入林中張弩俄發敵以運河
岸仄非騎兵之利稍引去遂大敗之斬統軍高景山俘
數百人錡在瓜洲四日無不戰恐人心不固乃遣人自

鎮江取妻子以安人心至是有詔令錡專防江上曾病
已劇乃肩輿渡江留劉汜以千五百人塞瓜洲渡續宋
資治通鑑編年

鑑七

十一月庚午金人犯瓜洲渡中軍統制官劉汜迎敵用

克敵弓射却之金人焚驛亭而去建炎以來繫年要錄一百九十四

壬申鎮江府中軍統制劉汜及金人戰於瓜洲鎮敗績

時金人以重兵直擣瓜洲權都統制李橫引諸軍迎戰
葉義問督鎮江駐劄後軍渡江眾以爲不可義問疆之
未著北岸義問懼怯之狀見於顏色卽向西去曰欲往
建康府催諸軍起發耳市人皆媟罵之金人兵勢甚重

汜提本部兵先走諸軍皆不進橫以孤軍不可當亦遁於是背印使臣不歸失其都統制印金人追官軍官軍壅路不能行遂涉運河而西亦有奔走得脫者金人鐵騎掩至江上左軍統制魏俊後軍統制王方戰死柳林中皆金瘡被體汜性驕惰不習軍事至是卒敗同上

甲申威武軍承宣使知舒州張淵權主管淮西安撫司公事拱衛大夫和州防禦使淮南東路馬步軍副都總管賈和仲權知揚州兼主管淮東安撫司公事候收復日續赴本任揚廬既失守義問言東路通泰州密邇鹽場利源所在見有忠義寨三二萬人西路流民所聚正

可招募以壯軍聲乃選用二人仍令和仲權泰州置司

故有是命

同上

左武大夫鎮江府駐劄左軍統制魏俊贈中衛大夫邕
州觀察使武功大夫鎮江府駐劄後軍統制王方贈拱

衛大夫蘄州防禦使官子孫如新格

同上

金主亮至揚州

宋史三十一

丁亥劉錡以疾罷以御營宿衛中軍統制劉銳權鎮江

都

同上

庚寅金主亮在瓜洲鎮御營宿衛使楊存中中書舍人
督視府參謀軍事虞允文以敵騎瞰江恐車船臨期不

堪駕用乃與臨江拽試命戰士踏車船徑趨瓜洲將迫岸復回敵兵皆持滿以待其船中流上下三周金山回轉如飛敵眾驚愕亟遣人報亮亮至見之笑曰此紙船耳因列坐諸將一將前跪曰南軍有備不可輕且采石渡方此甚狹而我軍皆不利願駐於揚州力農訓兵徐圖進取亮震怒拔劍數其罪命斬之哀謝良久乃杖半百而釋之

建炎以來繫年要錄一百九十四

按蹇駒采石瓜洲斃亮記載此事作辛卯

李通傳甲午令軍中運鴉鵲船及糧船於瓜洲渡期以

明日渡江敢後者死

脫服等金史一百二十九

金人分兵犯泰州初金人亮在瓜洲聞李寶由海道入膠西焚其戰艦而成閔諸軍方順流而下亮愈忿乃還揚州召諸將約三日畢濟過期盡殺之諸將謀曰南軍有備如此進有滄殺之禍退有敲殺之憂其中一將曰等死死中求生可乎眾皆曰願聞教有總管萬載者曰殺郎主却與南宋通和歸鄉則生矣眾口一詞曰諾平且諸將大懷忠蕭扎巴詣御寨奏事亮醉臥未起懷忠問宿直將軍樂嘉努曰郎主夜來有何聖旨嘉努曰昨夕與后妃飲言三日渡江不得將大臣盡行處斬諸將聞之益懼亮謂威勝統軍勸農使耶律阿里曰爾所將

勝兵我明日自點數少必誅無恕阿里自計兵亡已過
半與其子宿直將軍穆爾古謀亦欲殺亮亮有紫茸等
細軍不遣臨敵專以自衛眾患之扎巴日晚朝奏遣細
軍取海陵仍請樂將軍諭以禍福則可濟矣乃謂細軍
曰淮東子女金帛逃在泰州我輩急渡江汝輩何不自
郎主往取之細軍欣然共請亮許之於是細軍去者過

半

建炎以來繫年要錄一百九十四

乙未金人弒其主亮於揚州龜山寺

宋史三十一

完顏元宜傳乙未黎明元宜王祥與武勝金都總管徒
單守素猛安唐括烏野謀克幹盧保婁薛溫都長壽等

率眾犯御營海陵聞亂以爲宋兵奄至攬衣遽起箭入
帳中取視之愕然曰乃我兵也大慶山曰事急矣當出
避之海陵曰走將安往方取弓以中箭仆地延安少尹
給台幹魯補先刃之手足猶動遂縊殺之驍騎指揮使
大磐整兵來救王祥出之之曰無及矣大磐乃止軍士
攘取行營服用皆盡乃取大磐衣巾裹海陵尸焚之遂
收尚書右丞李通浙西路副統制郭安國監軍徒單永
年近侍局使梁琬副使大慶山皆殺之

金史一百
三十二

諸酋至亮寢帳前後皆亮親兵問諸酋云汝安往諸酋
諭之曰我欲帳中幹事親兵縱諸酋入引弓射帳中亮

被箭躡起猶挽弓欲射已而諸酋連以數箭斃亮兼殺侍寢妃花不如等五人明日諸酋遂麾軍退屯三十里北人田政以亮死報我師繼遣探騎偵虜虛實知虜果移屯

蹇駒采石瓜洲斃亮記

紫茸軍陷泰州統制王綱遁

續宋編年資治通鑑七

先是泰州守臣請祠去通判王濤權州事九月濤以移治爲名而去留州卽付兵馬都監趙福金人侵淮甸水寨都統領胡深與其副臧珪棄水寨率鄉兵二千入泰州以兵勢凌福福具申於葉義問義問以深權知州深以珪權通判福權本路兵馬都監淮南轉運副使提領

諸路忠義軍馬楊抗又以其右軍統領成忠郎沙世堅
權海陵縣丞兼知縣深聞金人欲犯泰州與世堅率其
眾棄城先遁珪掘斷堰盡洩運河水至是敵細軍至城
下遂徑登其城縱火擄掠福死於亂兵城中子女強壯
盡被敵驅而去時楊存中命殿前司右軍統制王綱以
所部權知泰州而城已陷矣

建炎以來繫年要錄一百九十四

十二月庚子楊存中及虞允文渡江至瓜洲察金兵

宋史

三十

辛丑以李寶爲浙西通泰海州沿海制置使

同上

細軍之在泰州者棄城而去

建炎以來繫年要錄一百九十五

壬寅王管侍衛馬軍馬公事淮東制置使成閔自鎮江引兵之揚州御營宿衛使楊存中亦遣右武大夫權殿前司右軍統領李仍自江陰軍引所部渡江之石莊進發時葉義問遣使臣李彪伺金人回軍動靜閔令報曰成太尉大軍在揚子橋相持來日當大戰矣彪不聽道路喧言金人已去揚州空虛閔計不行乃以軍馬司之兵自天長追襲王管侍衛步軍司公事李捧亦以神勇軍襲之敵軍凡數萬竈其行如林官軍皆不敢與相近但遙護之出境而已

同上

癸卯拱衛大夫和州防禦使權知揚州賈和仲聞敵去

乃以單騎入城猶未有官吏同上

成忠郎提領諸路忠義軍馬所右軍統領沙世堅自如

臯縣以忠義軍百餘人入秦州同上

甲辰殿前司右軍統制權知秦州王剛以所部至本州

侍衛步軍司中軍統制顧暉引兵泊瓜州鎮謀報金兵

自和州搭浮橋至六合縣暉不敢進留居之同上

乙巳金人遊騎焚真州報恩寺塔徑往天長同上

丙午淮東統制王選復楚州宋史三十一

紹興三十二年二月戊戌朔罷借江淮坊場淨利錢同上

三十

二

五月甲寅命張浚專一措置兩淮事務兼節制淮東西

沿江州郡軍馬同上

七月癸卯以張浚為少傅江淮宣撫使封魏國公同上

十二月丁卯令江淮宣撫司增減武勇效用軍同上

揚州圖經卷六終

